

Schwarz-Schilling se obratio Odboru za politička i sigurnosna pitanja Evropske unije te se sastao sa Javierom Solanom



Visoki predstavnik i specijalni predstavnik EU Christian Schwarz-Schilling danas popodne obratio se Odboru za politička i sigurnosna pitanja Evropske unije u Briselu te se sastao sa Javierom Solanom, visokim predstavnikom Evropske unije za zajedničku vanjsku i sigurnosnu politiku i predstavnicima Evropske komisije.

U obraćanju Odboru za politička i sigurnosna pitanja Evropske unije, Christian Schwarz-Schilling dao je ocjenu ukupne situacije u Bosni i Hercegovini i nepostizanja sporazuma o ključnim reformama. "Postignut je mali napredak u ispunjavanju preostalih uvjeta za potpisivanje Sporazuma o stabilizaciji i pridruživanju", rekao je Christian Schwarz-Schilling članovima Odbora. "Politički lideri i šira javnost moraju znati da će Bosna i Hercegovina početi da zaostaje ukoliko se ne bude djelovalo".

Christian Schwarz-Schilling također je pozvao Evropsku uniju da održi svoj trenutni angažman u Bosni i Hercegovini ističući važnost stabilnog i stalnog prisustva Policijske misije EU i EUFOR-a.

Visoki predstavnik i specijalni predstavnik EU u Briselu je također informirao ključne faktore odlučivanja o tekućim pripremama za nastavak procesa ustavne reforme. Naglasio je koliko je za Bosnu i Hercegovinu važno da se proces ustavne reforme izgradi u okviru institucija ove zemlje, što bi političkim strankama, parlamentu i građanskom društvu pružio forum za rasprave o pitanjima koja su dio reforme ustava.

“Specijalni predstavnik EU igra veliku ulogu u smislu konsultacija o ustavnoj reformi i organizacije razgovora, zajedno sa Sjedinjenim Američkim Državama. U tome vidim jedan od ključnih zadataka za svoga nasljednika,” rekao je Schwarz-Schilling.

Nakon razgovora u Briselu, visoki predstavnik i specijalni predstavnik EU sljedeće sedmice putuje u Washington, gdje će se sastati sa višim zvaničnicima State Departmenta. Iz Washingtona putuje u New York, gdje će se obratiti Vijeću sigurnosti UN.